

La Posta fa midadas

■ (anr/ld). **Sco quai che La Posta communitgescha midan diversas tariffas per il prim da schaner 2016. Il servetsch da chasa duai vegnir pli attractiv. La Posta fa diversas emprovas.**

Il prim da schaner 2016 adatta La Posta intginas taxas per ils clients privats e per ils clients da fatschenta. Singulas tariffas per brevs grondas/MiniPac internaziunal destinadas per l'exteriur vegnan reducidas per fin dus francs. Cun questas reduziuns tegna La Posta quint dals novs basegns da la clientella da pudair spedir chaussas pli pitschnas sin moda favuraivla. Las taxas per brevs «standard» fin 20 grams vegnan augmentadas per diesch raps, quai pervia dals custs pli auts en divers pajais da destinaziun. L'ultim augment datescha da l'onn 2010.

Las taxas per la Svizra restan stabilas.

Per las brevs A e B fin 50 grams e per ils pachets en Svizra na datti naginas midadas da las taxas l'onn 2016. Quellas taxas ha La Posta augmentà l'onn 2004. Sco quai che han demussà diversas retschertgas tutgan quellas tariffas per la Svizra tar las pli favuraivlas en cumparegliaziun cun l'exteriur.

Novas prestaziuns tar il servetsch da chasa

La Posta examinescha l'introducziun da novas prestaziuns tar il servetsch da chasa. Cun emprovas da pilot en 41'000 chasadas en diversas regiuns vul La Pos-

ta extender las prestaziuns en connex cun il servetsch da distribuziun. Da nov han ils clients al domicil la pussaivladad da retrair dal personal da distribuziun francaturas ed emballadi per spedir brevs e pachets en Svizra. Plinavant pon ils clients surdar al personal da distribuziun brevs e pachets francads u deponer tals en la chascha da brevs. En divers lieus pon ins er retrair satgs da rument tar il personal da distribuziun. Cun questas novas prestaziuns vul intensivar La Posta il contact da la clientella cun ses personal. Las emprovas da pilot cumenzan il 31 d'avust 2015.

Dapi il mais d'avrigl 2015 fa La Posta tar 20 uffizis emprovas davart l'acceptanza da products da terzs ed en 60 uffizis vul ella enconuscher la reacziun da la clientella davart l'avertura prolungada dals spurteglis da posta. La Posta vegn plinavant ad examinar il servetsch da vendita e da cussegliaziun.

